

Morning Dogri (NSD) National News Bulletin 28-06-2025

आकाशवाणी

खबरां प्रोमिला जम्वाल कोला।

1. प्रधानमंत्री नरेन्द्र मोदी होर अज्ज नमीं दिल्ली च आचार्य विद्यानंद जी महाराज शताब्दी समारोह दा शुभारंभ करगन।
2. भारत नै जम्मू कश्मीर च किशनगंगा ते रतले पनबिजली परियोजनाएं पर तथाकथित मध्यस्थता अदालत दे फैसले गी खारज करी दित्ता ऐ।
3. ऑपरेशन सिंधु तैहत हुनै तगर कुल 4 ज्हार 415 भारती नागरिकें गी पच्छिम एशिया च बने दे सुरक्षा हालात तैहत सुरक्षित बाहर कडडी लैता गेआ ऐ।
4. युद्धपोत ते पनडुब्बी बनाने आली देसै दी सब्बने शा बड्डी सरकारी कंपनी मझगांप डॉक शिप ब्यूल्डर लिमिटेड श्रीलंका दे कोलंबो डॉकयार्ड दा अधिग्रहण करोग।
5. महिला क्रिकेट च भारत ते इंग्लैंड बश्कार 5एं टी-20 मैचें दी श्रृंखला दा पैह्ला मकाबला अज्ज ब्रिटेन च ट्रेटब्रिज नार्थिघम च होग।

<><><><><><>

PM-Jain Spiritual

प्रधानमंत्री नरेन्द्र मोदी होर अज्ज नमीं दिल्ली च आचार्य विद्यानंद जी महाराज शताब्दी समारोह दा शुभारंभ करगन। ओह इस मौके पर लोकें गी संबोधत बी करगन। एह कार्यक्रम भगवान महावीर अहिंसा भारती ट्रस्ट दे सैहयोग कन्नै आयोजित कीता जा'रदा ऐ। आचार्य विद्यानंद जैन समुदाय दे इक प्रतिष्ठित आध्यात्मिक नेता ते समाज सुधारक न। उंदी 100मीं जयंति पर आयोजित श्रद्धांजलि समारोह इक ब'रे तगर चलोग। इस दरान देश भरै च सांस्कृतिक, शैक्षिक ते आध्यात्मिक कार्यक्रम होंगन। आचार्य विद्यानंद जी महाराज होरें जैन दर्शन ते नैतिकता पर 50 थमां मतियां रचनां लिखी दियां न। उनें प्राकृत, जैन दर्शन ते शास्त्रीय भाषें लेई बी कम्म कीता। उसै दे जैन मंदरें दे जीर्णोद्धार च इंदी अहम भूमिका रेही ऐ।

<><><><><><>

Court of Arbitration

भारत नै जम्मू-कश्मीर च किशनगंगा ते रातले पनबिजली परियोजनाएं पर तथाकथित मध्यस्थता अदालत दे फैसले गी खारज करी दित्ता ऐ। मंत्रालय नै आखेआ ऐ जे भारत नै इस मध्यस्थता अदालत दी कनूनी वैधता गी कदे बी मान्यता नेई दित्ती ऐ ते एहदा गठन सिंधु जल संधि दी गंभीर उल्लंघना ऐ। मंत्रालय नै आखेआ ऐ जे पहलगाम आतंकी हमले दे बाद भारत नै सिंधु जल-संधि गी स्थगित करी दित्ता ते भारत हून संधि तैहत कोई बी जिम्मेदारी निभाने लेई मजबूर नेई ऐ। एह फैसला बन्ने-पारा आहले आतंकवाद गी पाकिस्तान दे समर्थन दे मद्देनजर लैता गेआ हा। मंत्रालय नै आखेआ जे कुसै बी मध्यस्थता अदालत गी भारत दे इस फैसले पर सोआल पुट्टने दा हक नेई ऐ। बदेश मंत्रालय नै आखेआ ऐ जे एह फैसला पाकिस्तान दे इशारे पर लैता गेआ ऐ ते एह आतंकवाद दे वैश्विक केंद्र दे रूपै च पाकिस्तान दी भूमिका थमां ध्यान हटाने दी कोशिश ऐ।

<><><><><><>

Op Sindhu

ऑपरेशन सिंधु दे तैहत अजें तगर कुल 4 ज्हार 415 भारती नागरिकें गी पच्छिम एशिया च बने दे हालात दी वजह कन्नै ईरान ते इजराइल थमां सुरक्षत बाहर कड्डेआ गेआ ऐ। एहदे च ईरान थमां 3 ज्हार 597 ते इजराइल थमां 818 लोक शामिल न। जिनेंगी खास डोआरिएं राएं सुरक्षत बाहर कड्डेआ गेआ ऐ। विदेश मंत्रालय आस्सेआजारी इक ब्यान मूजब 14 ओसीआई कार्ड धारक, 9 नेपाली नागरिक, 4 श्रीलंकाई नागरिक ते 1 भारतीय नागरिक दी ईरानी घरै आली गी बी सुरक्षत बाहर कड्डेआ गेआ ऐ।

<><><><><><>

Punjab-NIA

राष्ट्रीय जांच अजेंसी एनआईएनै पंजाब दे गुरदासपुर थाने पर बब्बर खालसा इंटरनेशनल दे आतंकिएं आस्सेआ दिसम्बर 2024 च ग्रनेड हमले दे मामले च 7एं आरोपिएं चालाफ आरोप पत्र दाखल कीते न। अजेंसी नै एहदे च चऊं आतंकिएं गी गिरफ्तार करी लैदा ऐ जिसलै के 2 आतंकी ते साजशकर्ता फरार न। सब्बै गिरफ्तार आरोपी बटाला दे किला लाल सिंह ग्रां दे बसनीक न। गिरफ्तार कीते गेदे आतंकवादिएं च कुलदीप सिंह, अभिजीत सिंह, गुरजिन्द्र सिंह ते शुभम शामिल न। लापता आतंकिएं च अमरीका च रौहने आला परिसया, पाकिस्तानी

बसनीक हरविंदर सिंह टिंडा ते शमशेर सिंह शोरा शामिल न। एह सब्बै 12 दिसम्बर 2024 दे हमले दा षड्यंत्र रचने ते उसी तोड़ चाढ़ने च शामिल हे।

<><><><><><>

MDL

युद्धपोत ते पनडुब्बी बनाने आली देसे दी सब्बने शा बड्डी सरकारी कंपनी मझगांव डॉक शिपविल्डर्स लिमिटेड श्रीलंका दे कोलंबो डॉकयार्ड दा अधिग्रहण करोग। श्रीलंकाई कंपनी च 50 प्रतिशत दी निर्णायक हिस्सेदारी लेई एह सौदा 4 सौ 42 करोड़ रपे च होआ ऐ। एहदे च जापान दे ओनिमिशी डॉकयार्ड दे शेरें दी खरीद शामिल ऐ। ओनिमिशी डॉकयार्ड नै कोलंबो डॉकयार्ड थमां बाहर निकलने दा फैसला कीता ऐ। एहदे अलावा मझगांव डॉक लिमिटेड, श्रीलंकाई कंपनी आस्सेआ जारी नमीं प्रतिभूति खरीदग। कुल निवेश चा तकरीबन 2 करोड़ 30 लख डॉलर दा निवेश श्रीलंकाई कंपनी च कीता जाग।

<><><><><><>

Cricket

भारत ते इंग्लैंड दी महिला क्रिकेट टीम बश्कार 5एं टी-20 मैचें दी श्रृंखला दा पैहला मैच अज्ज ब्रिटेन च ट्रेंटब्रिज च होग। एह मैच भारती समें मूजब संजा साढ़े 7 बले थमां शुरू होग। भारती टीम इक दिनै दी त्रिकोणी श्रृंखला च अपने शानदार प्रदर्शन मगरा आत्मविश्वास कन्नै भरोची दी ऐ। तोआई इंग्लैंड नै बी हाल च गै वेस्टइंडीज पर जित्त दर्ज कीती ऐ। अगले ब'रे महिला विश्व कप ब्रिटेन च गै आयोजित कीता जाना ऐ।

<><><><><><>

IMD

भारती मौसम विभाग नै औंदे 2-3 दिनें दरान दक्खन-पच्छम मानसून दे पूरे देसै तगर पुज्जने दी पेशगोई कीती ऐ। मौसम विभाग मूजब देसै दे उत्तर पच्छम, मझाटले पूर्वी ते पूर्वोत्तर हिस्सें च अगले 7एं दिनें च बड़ी तेज बरखा पौने दी संभावना ऐ। गुजरात, केरल, माहे, मध्य महाराष्ट्र ते उत्तराखंड च अज्ज तेज बरखा पौने दी मेद ऐ। पंजाब, हरियाणा, हिमाचल प्रदेश, उत्तराखंड, पूर्वी ते पच्छमी राजस्थान ते जम्मू कश्मीर च अगले 2-3 दिनें च

मोहलेधार बरखा पेई सकदी ऐ। मध्यप्रदेश, छत्तीसगढ़, ओडिशा, झारखंड, बिहार, पच्छिम बंगाल ते सिक्किम च बी 3 जुलाई तगर तेज बरखा पौने दा अंदेशा ऐ।

<><><><><><>

CM FICCI

मुख्यमंत्री ओमर अब्दुल्ला होरें आखेआ ऐ जे एह सरकार ते सैलसफा कन्नै जुड़े दे सब्बने सरबंघत धड़ें दी सांझी जिम्मेदारी बनदी ऐ जे ओह जम्मू-कश्मीर गी इक बारी फही देसै दी सब्बने शा बधिया सैलसफा थाहर दे तौर पर स्थापित करन ते कन्नै इस गल्लै गी बी जकीनी बनान जे प्रदेश दी एह थाहर लगातार बरकरार रवै। मुख्यमंत्री होर कल श्रीनगर दे शोरे कश्मीर अंतर्राष्ट्री कन्वेंशन सेंटर – SKICC च आयोजित इक बशेश कार्यक्रमै दरान बोला करदे हे। जम्मू-कश्मीर च सैलसफा खेत्तर च परतियै जान भरने सरबंधी गल्लबात आहले इस कार्यक्रम दा आयोजन फिक्की ते जम्मू-कश्मीर दे सैलसफा मैहकमे आसेआ सांझे तौर पर कीता गेदा हा। इस मौके अपने भाशण च मुख्यमंत्री होरें आखेआ जे उं'दी सरकार, सैलानिएं दे तजुर्बे गी होर बेहतर बनाने पर केन्द्रित नमीं पैहलकदमिएं पर कम्म करै करदी ऐ। हाल दिएं चुनौतिएं बारै बोलदे होई ओमर होरें 22 अप्रैल शा पैहले आहली स्थिति ते ओहदे मगरा बने दे हालात पर बी लोऽ पाई ते आखेआ जे पहलगाम आतंकी हमला बड़ा मंदे भागें आहला हा ते एहदे परैन्त सैलानिएं दी आमद च चानचक्क गै बड़ी मती कमी दर्ज कीती गेई।

<><><><><><>

President

राष्ट्रपति द्रौपदी मुर्मू होरें आखेआ ऐ जे भलेयां लौहके, लौहके ते दरमेयाने कारोबार भारत ते विश्व दी अर्थबवस्था दी रीढ़ दी हड्डी न। कल नमीं दिल्ली च अंतर्राष्ट्रीय एमएसएमई दिवस समारोह गी संबोधत करदे होई राष्ट्रपति होरें आखेआ जे एमएसएमई खेत्तर देश दे विकास च महत्वै आली भूमका नभा'रदा ऐ।

<><><><><><>

NCW

राष्ट्रीय महीला आयोग नै दक्खन कोलकाता च बलात्कार आले मामले दा संज्ञान लैदे होई कोलकाता पुलस कमीशनर होरें गी लिखेआ ऐ जे त्रऊं दिनें दे अंदर इक विस्तृत कारवाई रिपोर्ट आयोग अगगे पेश कीती जा।

<><><><><><>